

# Zonini Luhuva Nampa 1

---

**Alévolé oko minoakalímini agepagú gakotó mina ve**

**1** <sup>1</sup> Mukí netá apí oko utó ikutí ká emane minoloko voko minamó itó lagatatunú gulunimó itó logómulatunú ánígunimó itó logómulatunú ánígo gisili hizeko ánígunike ligizanitunú ale geleko ánígunimó nene minova minova oko minoakalímini agepagú gakotó mina vemú luhuva imane gizo nolukumuve. <sup>2</sup> <sup>b</sup> Minoaká gihila utó o lamaná okago ánígunitita alévolé oko minoloko voko minoakalímini gakola nene lo utó moloko lo lekemeaká nounge. Alévolé oko minoloko voko minoaká ve nene amelahitoka minoloko voko minake alika lelitoka utó imó. <sup>3</sup> Nenemú netá matá ánígoko geleko unimóma ámina oko lo lekemeaká nounimó nene lekeza gilikiko ligika molo hamó oko lamaná oko apizeko minatune loko nenemú loaká nounge. Itó ligika molo hamó oko lamaná oko apizeko nominuhá nene ametehitoka itó gipala Izesu Kilistotoka neve. <sup>4</sup> Nenéminoko utó okiko, mulutegú agila guluma o asú itive loko luhuva netá imane gizo nolukumuve.

**Ómasímini lapanakú minoko aleko ituni gakó**

<sup>5</sup> Gakoláa nene Izesutokatí lá oko gelekuhámave loko lo lekemeaká nounge: Ómasiloka límugusi makó ma nomive. Lapaná loake molo minamó neve. <sup>6</sup> Leza límugusigú minoko aleko inake Ómasigi ligika molo hamó oko lamaná oko apizekune loko litunimó nene sozagi linogo une. Itó netá gihiláa nene ma ale minamitune. <sup>7</sup> Ezáa nene lapanakú noive. Ámina oko leza nene lapanakú minoko aleko itunimó nene ligika molo hamó oko vatí oko apizeko minanogo une, itó gipala Izesu Kilistoni golanímo lihima netate monéna nagamí zekiko ligika guluvitanogo ive. <sup>8</sup> Leza golesa netate nomive loko litunimó nene ligikate agoka vizinogo une. Itó gakó gihila gotoláa nene ligikagú ma minaminogo ive. <sup>9</sup> Itó golesa netate lo utó molatunimó nene, Ómasímo lo mololeta netá amegesaló moloaká ve netá hee lokogó aleaká noi ve noinazo, golesa

---

<sup>a</sup> 1:1 Zon 1:1    <sup>b</sup> 1:2 Zon 1:14

netate nagamí zeko lihimavate ale ahulo asú inogo ive. <sup>10</sup>Golesa netá aliaká niave loko lolimiaká noinazo, leza golesa netá alesá amune loko litunimó nene Ómasimú nene sozaló veve loko lotunimó gilinogo ive. Itó aí gacoláa nene ligikagú minaminogo ive.

### Golesa netatemú goní nouko lelitoka alemo moloaká ve Izesú

**2** <sup>1</sup>Izegipánemata, netá golesa alikatave loko gako imane gizo nolukumumóza, makó keza netá golesa alitamó nene, ametehitoka golesa netatemú goní nouko Izesu Kilistó eza hee loko mina vémo lelitoka alemo moloaká ve noive loko lo nolukumuve. <sup>2</sup>Áisi nene lihimate asú itive loko gapo veletamó nene lelikumukó negopa, numutó namató vejená mukikumukive loko monéna veletamóma neve. <sup>3</sup>Ómasímo lo hukoko li gako nene gele alekuko, aikumú gele guni unitímini mogonáa utó okiko, gilinogo une. <sup>4</sup>Itó lo huka gacoláa gili alemitamó nenete Ómasimú gele guni o nune litamó nene sozaló veve loko loketatumize. Ve nenémináatini mulúikú gako gihiláa nomive loko litunize. <sup>5</sup>Itó helegaloka Ómasímini gako ámegetiki minatamó keza kigika Ómasi amikamómámini gihiláa utó o asú okave. Lá okago nene, Ómasiloka gímizi lamaná iakalímini mogonáa utó okiko, ánigoko gilitunize. <sup>6</sup>Lá oko utó itikumú noluve: Makó keza Ómasiloka gímizeko nune litamó keza Izesú oko moloko imó nenémini avevezahaló minanigave.

### Lo hukoko li gako gosohá

<sup>7c</sup> Nigika lukumu vejenáise, neza lo hukoaká gako gosohá makó lo nolukumumó negopa, litaha mogonalokatí gili-liki viki minamóma nene, gako li likiminamóma nenémini lo huka gako litaha gohakú lo lakagata naluve. <sup>8</sup>Itó gako luhuva nogizumó imane lo hukoko li gako gosohá noimó nogilive. Itó límugusi mota tolova noigo, lapaná gihiláa nene utó o lamaná oko noinazo, ámina gosohá lo hukoko li gako nene Izesutoka itó lekelitoka gako gihiláa loló oaká noive. <sup>9</sup>Itó kigivéikini mukahá kipiliaká nita vejená keza nene lapanakú nune liki litamó nene, keza límugusigú niake nilave loko litune. <sup>10</sup>Itó kigivéikini kigika kimiiki nasahilí ikitatamó keza nene lapanakú vatí iki minanigave. Lá niiko, golesa netakumú gala vizé vizé nenémo keitoka ma utó osá aminogo ive. <sup>11</sup>Itó makolímohe makolímohe agivelahini mukahá apilitimó nene límugusigú minanogo ive. Itó límugusímini gapoló vinogo ive. Eza límugusímo agikámini agómula likokamó nenazo, ligitagani okoko gapo nene ángo hee loko ma ángaminogo ive.

<sup>12</sup>Mohóne gipáne lekeza Izesuni agulizá alinakumú lihimatini ahulolikimikamóma nenazo, nenemú gako imane gizo nolukumuve.

° 2:7 Zon 13:34

<sup>13</sup> Améikita lekeza minoloko voko minamó noi vemú gili guni iki gilikamóma nenazo, nenemú lekelí gakoaláa imane gizo nolukumuve. Itó gosohá ve lekeza golesa netalímíni amelahináa amuza mili miliki aviligikamóma nenazo, nenemú gako imane gizo nolukumuve. <sup>14</sup> Itó mohóne gipáne lekeza ametipini mogonamú gili guni iki gilikamole loko luhuva imane gizo nolukumuve. Améikita lekeza minoloko voko minamó noi vemú gili guni iki gilikamómave loko gakoaláa imane gizo nolukumuve. Gosohá ve lekeza amuzaváa milamole loko itó Ómasímíni gakoaláa likigikagú nego golesa netalímíni amelahináa aviligikamole loko gakoaláa imane gizo nolukumuve.

<sup>15</sup> Mikasiuka Ómasigi nomi suni itó mikasímíni amupiló netá matá utó netó mulutini milikiko lukumu helemino. Makó keza mulúini nene mikasímíni amupiló ne netató milikiko minatimó keza kigika nene améipini amisá amave. <sup>16</sup> Gilinahe. Mikasiuka netá matá mukí nene lugupémo mumuzó oaká noi netá itó logómulámo áni go laga oaká netá itó ligika lugupe aleko ite ite netá nene ametehitokatí nomive. Nene mikasiukatile. <sup>17</sup> Itó mikasi eza gumesisivagi minoko vo otolova inogo ive. Lá itimóza, Ómasímíni agikaló mini milatamó keza miniliki viki mini lúaló miliki minanigave.

### Kilistoni gala vela napámíni gako

<sup>18</sup> Mohóne gipáne, gamena nene mota alínipa o asú okave. Nenemú lekeza Kilistoni gala ve napa utó itive liki lina gako mota gilinahe. Itó itína gala veva mukí utó iake miniliki vinave. Nenemú nene gamenaváa mota alínipa o lamaná okave loko gelenoune. <sup>19</sup> Kilistoni gala ve keza utó amoláa nene lelitokatí ahulilimi iake vikamoláa nene lelí ligive lagave gihila lílí iki minamamó neve. Keza ligive lagave gihila minalina nene, ma ahulilitamaline. Itó ahulilimikamole loko keza ligive gihila lílí iki minamatímíni mogona utó okave. <sup>20</sup> Lá ikamóza, lekeza mukító nene apazá amelaho Sikalahula hololeketamole liki gako gihila geleakalímíni lílí iki niave. Nenemú luhuva imane gizo nolukumuve. <sup>21</sup> Lekeza gako gihila gelemave lokogopa gako gihila giliaká niamómave loko, itó soza saza mukí nene gako gihilámíni agikagutí ma utó osá amimole loko luhuva imane gizo nolukumuve. <sup>22</sup> Soza sazáló veve nene éaginimú litune. Ve makolímóhe makolímóhe Izesú eza gologí oletative loko amisili ve nomive loko nolikoma, aikumú sozaló veve loko litune. Amelahiko gipalago áni gihila ahulata vejenakumú nene Kilistoni gala vejenale loko litunize. <sup>23</sup> Makó keza Ómasímíni gipala áni gihila ahulatamó nene amelahnigi áni gihila ahulanigave. Makó keza gipalamú ali miniki litamó keza nene amelahnigi alími kamatoka milanigave. <sup>24</sup> Lekeza mogonalokatí emane monó gako gihila gihila iki minamó nene gili zagi minalo. Monó gakoaláa gili zagi minatamó nene amelahiko gipalago

keitoka gímizi lamaná inigave. <sup>25</sup>Izesú lehizeletatove loko lo mololeta netá nene alévolé lemetameni gi minoaká nene neve.

<sup>26</sup>Likigika ali gopánapa ilikitanigi nia vejenakumú gakó láa loko luhuva nogizumóza, <sup>27</sup>lekelikumú láa loko noluve: Sikalahú mololeketamó nene mulutikú minoko aleko oaká noive. Nenemú ve makolímó sozagi lamanaki nanave loko ale gizaká oko lo likimitive. Nene ma nomive. Sikalahú hololeketamó áisi gakó mukí lainim-oleketoko lo lekemeaká noive. Itó aí gakola nene sozagi ma nomive. Lamanakó nenazo, nenemú Sikalahulímó lo likimi gakó nene gili aliiki Kilistotoka gímiziki minalo.

<sup>28</sup>Mohóne gipáne lekeza likigika avasavagi miniko miniki Kilistó eza anititi gamenaló utó noiko agómualó lokovoza helemitive liki Kilistotoka gímiziki minalo. <sup>29</sup>Ómasi eza hee loko noitímó noive liki gilinitamóma nene, netá ali hee liaká nia vejená mukitó keza Ómasilokatí utó amole liki gili zagitave.

### Ómasímíni izegipala nominune

**3** <sup>1d</sup> Gilinahe. Ameteho nene mohóneve gipáneve loletamó nene agika haitolfminoko limike lá oletamóma neve, itó leza lamaná aí izegipala nominune. Itó monóini nomi vejená keza Ómasímíni mogona áni gi hee lisá amanazo, nenemú lelí mogona áni gi hee lisá amave.

<sup>2</sup>Nigika lukumu vejenáise, leza itínasa nene Ómasímíni mohola gipala nounize, itó minoko nana avevezahaló utó itunimó neve. Nenémíni mogona litá oko utó o lamaná amimóza, láa loko gelenoune. Guivahani utó iti zupahé nene ametamenía áni go gisili hizeko áni gatune, nenemú lezagi aí ametamenigitana minanogo une. <sup>3</sup>Itó makó keza nenemú kagata losi gelemiki ageva iki minata vejená nene, Guivahani eza vové aveláa noinazo, ámináminoko minatune liki kigikáa álmi guluvitanigave.

<sup>4</sup>Lihima netá aleaká nenémo Ómasímó lo mola gakó ahelú oaká netá nenazo, lihima netá aliaká nia vejená keza Ómasímó lo mola gakó nene avutá iaká niave. <sup>5e</sup> Itó lekeza Izesuni mogona giliaká niave. Eza lihimate ale olové inogo utó imó. Lá oake ezáaloka nene golesa netala ma minamimó neve. <sup>6</sup>Nenemú makó keza Izesuki apiziki miniaká nia vejenalite golesa netá aliki minaminigave. Itó makó keza golesa netá aliki miniaká niamó nenete Izesuni mogonáa áni gi hehe lisá amave.

<sup>7</sup>Mohóne gipánemata, makolímó oko lekelémo gopa itove loko nolikoma, gili amemilo. Makó keza netá ali hehe liki nalikoma, keikumú nene hee liki miniaká nia vejenale loko litunize. Itó Izesú nominatímíni hehe liki minataze. <sup>8</sup>Makó keza lihima netá aliki minatamó nene Satani vejenala minatave. Satá eza lihima netá nene

<sup>d</sup> 3:1 Zon 1:12    <sup>e</sup> 3:5 Zon 1:29

mogonaloikatí aleloko voko minamó. Itó aleko minoaká noigo, Ómasímini gipalámo Satani hozaváa nene apeleko ale ahulanogo omo anitimó neve. <sup>9</sup>Ómasilokatí utó amó nenete Ómasímini ametameni ali minamó nenazo, keza lihima netá aliki minaminigave. Keza Ómasilokatí utó ikamole liki lihima netá aliki minaminigave. <sup>10</sup>Ómasímini izegipala itó Satani izegipala keí mogonatagana lá oko nene utó iko ániganogo une. Makó hehe liki minamitamó keza Ómasilokatí niave loko lamitunize. Itó makó keza kigikáini nene kigivéikini kememikoma keikumú nene ámina oko litunize.

### Ligika eza amiko eza amiko oko minatune

<sup>11f</sup> Monó gakó lekeza mogonaloikatí gililiki iva iva niamó nene lá oko neve: Ligika eza amiko eza amiko oko minatunize. <sup>12s</sup> Atani gipala Kaini ámegetamitunize. Eza golesa netalímini amelahináámini gipala loló oake agunala apele hilimóma neve. Lá imó nene ezáa oko moloko imoláa golesa okagove loko, itó agunalámo oko moloko imoláa lamaná okagove loko apele hilimó neve.

<sup>13</sup>Nigive nagavese, monóini nomi vegealite alivi galativi nililikitikoma, giliiki gosohá suni neve liki lamilo. <sup>14h</sup> Ligika nene ligivetegini kemeaká nounimó nenazo, nenemú helenouhakutí atiginá oko voko alévolekú vo holokuháma neve loko geleaká nune. Vegená makolite kigivéikini kigika kememitamó nene kigika hele vimó minikave. <sup>15</sup>Itó kigivéikini mukahá kipilita vegeaná nene kipili hiliaká ve kigikagi niave. Itó kipili hiliaká vegeaná nene alévolé kemetamenigi iki minamave liki lekeza giliaká niave. <sup>16</sup>Izesú eza lelikumule loko minoko aleko imola nahulake agika limimómámini mogona ale utó molokago ánigokune. Nenemú leza ámina oko ligiveteginimule loko minoko aleko itunimoláa ahulatave loko loletonoimóma neve. <sup>17</sup>Ve makolímo iza goula nosá henokanoni minumunímo vaí oko minati vémo agivelaho makó nene netá makokumú vitagá noiko ánigooko ánigo goselé itimó nene, Ómasiloka agika ma molamive loko litunize. <sup>18</sup>Mohóne gipáne, leza ligika nokiminake nene gakotunukó itó legepatunukó nomive. Nasahilitunú itó legepatunú ligika kemesá neve.

### Ómasímini avogisaló ligika ale hamokó molatune

<sup>19</sup>Lá okuko, gakó gihiláámini vegejala nounitímini mogonáa utó okiko, ánigoko gilino une. Itó ligikagú losi pasi noikoma Ómasímini avogisaló ligikagú hulu iko minatunize. <sup>20</sup>Netá golesamú goní ituni gakó ligikagú nekoma, láa loko litunize: Ómasi eza ligikámini avevezahaló nomive. Eza haitolíninoko minake, netá matá gele kolosoko geleaká

<sup>f</sup> 3:11 Zon 13:34   <sup>s</sup> 3:12 Apí 4:8   <sup>h</sup> 3:14 Zon 5:24

noinazo, lihimatemú oko ahuloletaminogo ive. <sup>21</sup>Nigika lukumu vejenáise, netá golesamú goní ituni gakó ligikagú nomikoma, Ómasímini avogisalo lehelele vizemiko vatí oko minanogo une. <sup>22</sup>Itó gakoaláa gele alekunike oko moloko oaká nouni netá nene eza gele lamaná oaká noinaze, nenemú nene aitoka netá matakumú voká lokuko lemeaká noive. <sup>23</sup><sup>i</sup> Gakoaláa lo hukoko li gakó láa loko neve: Gipala Izesu Kilistoni agulizaláa gele alévolé inake loletonoimómáminoko ligika eza amiko eza amiko oko minatune. <sup>24</sup>Lo huka gakoaláa gili alita vejená keza Ómasigi apizi lamaná iki niminiko, Ómasi eza mulúikú minoko aleko inogo ive. Itó Sikalahú lehizeletamó áisi lo lemekago, Ómasi eza mulutegú minoko aleko oaká noive loko geleaká nune.

### Gakó makó Ómasilokatí nehe nomihe gele hee litune

**4** <sup>1</sup>Nigika lukumu vejenáise, Sikalahulímo lelémo vávani igo loaká nune liki liaká nia vejenalitiní gakó nigiliki mukí nene Ómasilokatí neve liki gelemilo. Gakó lili ali ve sozámíni mukí utó iake hutilí ikamó nenazo, gakó makó nene Ómasilokatí nehe nomihe gele hehe litune liki mili gililo. <sup>2</sup>Ómasímini Sikalahulímo kelémo vávani okave liki lá iki ángataze. Izesu Kilistó nene lelí lugupe ale luhoake utó imó neve liki li utó miliki lita vejená nene Ómasilokatí niave loko gilitune. <sup>3</sup>Itó makó keza Izesunimú láa liki lamikoma nene, Ómasilokatí niamave. Keza Kilistoni gala ve napámíni gakotó nilave loko gilitune. Aikumú nene mikasiuka utó itive liki li likimikago gilinamóma neve. Itó itína nene mota utó okave.

<sup>4</sup>Mohóne gipáne, lekeza Ómasilokatí utó iake, monó gakó lili ali veva sozámíni nene amuza miliki kiviligikamóma neve. Lekelí mulutikuka minoaká noi vémini zámuzalámo mikasiuka noi ve golesámíni zámuzala nene avilegeneive. <sup>5</sup>Monó lili ali ve sozámíni keza mikasímíni amupiló netakumukó liaká nianazo, monóini nomi vejenalite gakóini nene ali kagatagú miliaká niave. <sup>6</sup>Leza nene Ómasilokatí utó unimó nenazo, Ómasímini mogona ángi hee liki ángi vejenalite gakote giliaká niave. Ómasilokatí utó amamó nenete gakote gili ahuliaká niave. Gakó gihilámíni mogona itó ale gopa oaká gakoalámíni mogona lá oko utó noigo ángo guni oaká nune.

### Ómasímini mogona nene agika lemeakalímíni neve.

<sup>7</sup>Nigika lukumu vejenáise, ligika kemeaká suni nene Ómasilokatí nenazo, nenemú leza ligika eza amiko eza amiko oko minatunize. Makó keza kigivéikini nene kigika kimiki nasahilí ikitatamó nene Ómasilokatí utó a vejená niave. Itó Ómasímini mogona gili hee linave.

<sup>i</sup> 3:23 Zon 13:34, 15:12,17

<sup>8</sup>Ómasímini mogona nene agika lemeakalímini nenazo, makó keza vejená makó kigikatunú nasahilí ikitamitamó nene, Ómasímini mogona ángi hee lamave loko litune. <sup>9</sup>Ómasímini gipala hamó nene alévolé oko minoaká netá nene aitotí alitune loko mikasiuka amiselekago limitímo agika limimómámini mogona lelitoka utó o lamaná okave. <sup>10</sup>Ligika kemeakalímini mogonáa lá oko neve: Leza Ómasi ligika amehá negopa, áisi nene agika limike gipala amiselekago limike lihimate asú iti gapo veletetamó. <sup>11</sup>Nigika lukumu vejenáise, Ómasi eza haitolíminoko agika lemekamó nenazo, nenemú leza ámina oko ligika eza amiko eza amiko oko minatune. <sup>12</sup><sup>j</sup> Vegenalita Ómasi ángoaká nene ma ángonamunimóza, ligika eza amiko eza amiko oaká nenegú oko moloko itunimó nene Ómasímo mulutegú minoko aleko noitímini mogonáa ale utó inogo ive. Itó agika lemeaká noimó nenémo vihelé loko minanogo ive.

<sup>13</sup>Áisi lelí lelémo amakuka moloaká noive. Itó lelí mulutegú minoko aleko oaká noive. Nenémini mogona nene Sikalahula lehizeletamole loko gelenoune. <sup>14</sup>Ameteho numutó namató vejená lugutó vizitive loko gipala amiselekago limimó nene leza logómula gihilatunú ángokunimóma neve. Itó nenemú gakó imane lo utó moloaká noune. <sup>15</sup>Itó Izesú eza lamaná Ómasímini gipala noive liki lita vejená keza Ómasiloka gímiziki minanigave, itó Ómasímo ámina oko mulúikú minoko aleko inogo ive. <sup>16</sup>Ómasímo agika lemeaká noimó nene ángoko gelenoune. Itó gele seketigí oko gelekune.

Ómasímini mogona nene agika lemeakalímini neve. Itó vejená makó kigika kimiliki viki miniki aliki ita vejená keza Ómasiloka gímiziki minanigave. Itó Ómasímo mulúikú minoko aleko inogo ive. <sup>17</sup>Nenéminoko ligika kemeaká nouni netá nene vihelé loko minanogo ive. Lá okiko Izesú eza mikasiuka imane minoko aleko oaká imómáminoko leza minoaká nounimó nenazo, nenemú gamena napaló mulutegú hukili amiko ote hee loko minatune. <sup>18</sup>Lelegesá itó ligika kemeaká keza apiziki minisá amasive. Ligika kemeaká netá gihilámo nene lelegesá legeaká netá ahelú inogo ive. Netá makokumú lelegesá ligitimó nene ámina netalímo miluma gilituni netá lumupiló molatihe loko lelegesá legeaká noive. Nenemú makó keza kelegesá ligiti vejenatoka kigika kemeaká netalímo vihelé loko minamive loko litune. <sup>19</sup>Ómasímo ganá agika limimóma nenazo, nenemú ligika kemeaká noune. <sup>20</sup>Ómasi ligika ameaká noune liki kigivéikini mukahá kipilita vejenakumú nene sozaló veve loko litune. Mota gilinahe. Ligivetegini logómulatunú ángoaká vejená ligika kememitunimó nene, Ómasi ángamoaká ve ligika amesá nomive. <sup>21</sup>Izesú láa loko lo hukoleta gakó geleaká noune: Ómasi kigika amiaká nia vejenalite ámina iki kigivéikini nene kigika kemeakalímini genaváa keitoka neve.

<sup>j</sup> 4:12 Zon 1:18

### Mikasiuka netá apelekuko limiti mogona

**5** <sup>1</sup>Izesukumú nene gologí oletative loko lo mololeta veve liki gili seketigí itamó keza Ómasilokatí utó a vejená niave. Itó makó keza améipini nene kigika amitamó nene agapilamolagi kigika kimiaká niave. <sup>2</sup>Leza Ómasi ligika ameko lo hukoleta gakó gele aleaká nounitímo Ómasímíni mohola gipala ligika kemeaká noupe loko nenémíni mogona lo utó moloaká noive. <sup>3</sup><sup>k</sup> Ómasi ligika ameakalímíni mogona nene lo huka gakó mukí gele aleakakú neve. Ómasímo lo huka gakó ámegetoaká nene genavagi nomive. <sup>4</sup>Ómasilokatí utó unimó mukitoka leza mikasi amupiló netá golesa lisomikuko lemeaká noive. Mikasi amupiló netá golesa lisomikuko lemeaká noitímíni zámuza nene agulizaláa gele alévolé oakate nene neve. <sup>5</sup>Éage amuza miliki mikasímíni amupiló netá golesa mukí lisimikiko limitive. Izesunimú Ómasímíni gipala noive liki gili seketigí iki gilita vejenalitegó nenémíni inigave.

### Ómasímo gipalámíni gakola hize lé ota gakó

<sup>6</sup>Izesu Kilistó áisi nene nagamilagi golanigi utó imole. Nagamilagigó nomive. Utó imó nene monó nagamí holamoki golani lekike hilimoki neve. <sup>7</sup>Sikalahú eza gakó gihiláámíni amelaho noinazo, Sikalahulímo nene ámina mogonamú lokago, gihila zeaká noive. <sup>8</sup>Nenemú Sikalahú ezáa itó monó nagamí holamó nenémo itó golani lekike hilimó nenémo Izesuni mogona hizi lé itake hoza aliaká niave. Sikalahú itó nagamila itó golaniva keza losive makole niatite Izesú nene Ómasímíni gipala noive liki hamó gakó liaká niave. <sup>9</sup>Goní ikitató nene vejenalita oko moloko imole liki litamó itó oko moloko amimole liki litamó nene gele seketigí itune. Lá onoimóza, Ómasímo li gakó nenémo avilegeko alévolé oko noive. Ómasi eza gipalámíni gakola hize lé otamó nene láa loko neve: <sup>10</sup>Ómasímíni gipalamú gili alévolé ita vejená keza kigikatunú gelego alévolé oaká noive. Itó Ómasímíni gakó gili alévolé amita vejená keza Ómasímo gipalamú li gakó gilikago hutuvagó loló onoimó nenazo, nenemú vejená nenémínáate Ómasimú sozaló veve nilamó geleneive. <sup>11</sup><sup>l</sup> Itó gipalámíni mogona hize lé oko gakó limó nene láa loko neve: Ómasi eza alévolé lemetameki minoaká netá ale utó molo limimó, itó alévolé oko minoakalímíni mogonáa nene gipalaló neve. <sup>12</sup>Ómasímíni gipala ali gikitiki minata vejená keza alévolé kemetameni alikamó neve. Itó Ómasímíni gipalaló gímizema vejená keza alévolé oko minoaká nene alemave.

### Alévolé lemetameki minoaká gakó

<sup>13</sup>Ómasímíni gipalamú gili alévolé inamó lekeza alévolé lekemetameki minoaká nene mota alenoune liki gili seketigí iki gilitave loko luhuva

<sup>k</sup> 5:3 Zon 14:15    <sup>l</sup> 5:11 Zon 3:36



imane gizo nolukumuve. <sup>14</sup>Leza láa loko Ómasímini avogisalo gele olopá onoune: Ómasiloka netá makokumú voká lokuko nene ezáa gilitó molató noikoma gele liminogo ive. <sup>15</sup>Itó netá nemupe manamupe voká lokuko gele liminogo ive loko gele seketigí onounimó nenazo, netá makokumú voká lotatunimó nene litá oko ale ligizakú itune loko gelenoune.

<sup>16</sup>Ve makó eza agivelaho makolímó golesa netá alekikoma ánígokoko lolímíni mututonáa loló oakalímíni nomikoma, ánígokoko nene aikumú Ómasiloka lotino. Lokikoma, Ómasímó alévolé gapoló alémo molatize. Itó golesa netalímíni nagaláa nene lolímíni alévolé nagala alemitimolamú noluve. Golesa netá makolímíni nagá nene lolímíni nagaláa nene neve. Nenémináamú numuna hoza alitave loko lamuve. <sup>17</sup>Netá golesa mukitoka nene lihima aleakalímíni nemóza, golesa netá lugáa nene lolímíni nagaláa alévolelagú lelémó molatitímíni nomive.

<sup>18</sup>Leza láa loko geleaká noune: Ómasilokatí utó atite nene golesa netá aliki minaminigave. Ómasímini gipalámo gizapa okimikiko golesa netalímíni amelaho kugupeló ma ale gelemínogo ive. <sup>19</sup>Leza Ómasilokatí utó unimó neve loko, itó monóini nomi vegená mukitoka keza golesa netalímíni amelahíni sepenauka akiaká niave loko gelenoune. <sup>20</sup>Itó láa lokogi gelenoune: Ómasímini gipala eza mikasiuka lemeake gele guni oakate ale utó olimikamó nenazo, Ómasi gihilámíni mogona gele guni oko geleaká noune, itó Ómasi gihilaloka gímizekunimó nene gipala Izesu Kilistoni sepenauka minoko aleko oaká noune. Áisi nene Ómasi gihila itó alévolé oko minoakalímíni amelahóa noive. <sup>21</sup>Mohóne gipáne lekeza soza saza ómai netakumú gizapa i guni iki minalo.